

TRANSCRIPTION

Contrat de mariage

Le vingt neufviesme Jour du moys doctobre Lan
mil cinq cens Soixante quatre Comparant en
Leurs personnes Rolland de thoisy escuyer
Sieur de polligny Damoiselle Saveryenne
de torneblanle Sa femme et damoiselle Barble [sic]
de thoisy Leur fille Lesdictes femme et fille presentes de
Lauctorite dudit Sieur de polligny pour elle dune part
Philippes de bournonville escuyer Sieur de
champeigny present pour Luy dautre part
Lesquelles parties entre elles ont faict
Les traictz accordz et convenances de mariage
que Sensuyt A Scavoir que Lesdicts Sieurs
philippes de bournonville Et Ladictte damoiselle
barbe de thoisy de Lauthorite que dessus ont
promis prandre et espouser Lung Autre
Selon La religion de Sainte eglise En faveur
duquel Lesdicts rolland de thoisy et Ladictte
de tornebranle et chascun deulx Sans division Ont
promis payer et bailler en dot de mariage
a leurdictte fille La Somme de trois mil Livres
tournois payables de dans quatre ans prochains
Et en default de payer dedans Lesdictz
temps Ladictte Somme de trois mil Livres
porteront arrerages a huict pour cent
De Laquelle Somme Le tiers Sortira nature
de meubles entre Lesdictz futeurs mariez Et
Les autres deux tiers nature danciens
heritages pour et au proffict de Ladictte
future espouze Ses hoirs et ayans cause
Et en recepvant Lesquels denyers Sortissant
nature dheritages Ledict futeur espoux Sera
tenu Les assigner Sur bons et Suffisans heritages
a ladictte raison de huict pour cens ou en acheter
bons et Suffisans heritages pour en Joyr par
elle Ses hoirs et ayans cause Suyvant La coustume
de ce pays et duche de bourgongne Et ont promis

Lesdictz Sieur de polligny et Sadicte femme habiller
leurdicte fille dhabis nuptiaulx bien et dehuement
a Scavoir de deux robbes Lune de velours Lautre
de damas Avec deux devant de cothes Lung de
velours et Lautre de Satin Et Ledict futeur espoux
a promis enjoueller Sadicte future femme Jusques
a La Somme de Six vingtz escuz Sol Pouront
Lesdictz futeurs mariez faire dommage Lung de lautre
tant par (donation) entre vifz que ordonnance de derniere volunte
Nonobstant toutes choses et coustumes a ce
contraires. Sera douhee Ladicte future espouze
quant Le cas escherra Sur Les biens dudict
futeur espoux de La Somme de huict vingtz Livres
tournois de rente Sur Sa terre de chamsigny et
de proche en proche Et oultre pour La demeurence
dudict [sic] damoiselle Sa vye durant du chastel Jardin
et vergers de Ladicte terre de chamsigny Seulement
Et Sil y a hoirs dudict mariage Ils auront pour
Leur demeurence La moictie desdictz chastel
Jardin et vergers dudict chancigny Le Surplus
du present traicte entre Lesdictes parties demeurera regle
Selon ladicte coustume Et moyennant Les choses
Susdictes Ladicte damoiselle barbe de thoisy de Lauthorite de
Son futeur espoux a Renonce a Ses droictz paternelz et
maternelz a escheoir au proffict de phillibert de thoisy escuyer
Son frere present et acceptant faict et accorde a
Polligny presens noble et Scientiffique personne Leonard
bataille grand prieur du moustier Saint Jehan Philibert de
Jaully Sieur de dracy Lazare bachart Sieur de thury
Philibert de helyot Sieur de fossy Jehan Simple Sieur de la
court et hugues de chaugy escuyers tesmoings
Signe Roland de thoisy et de bournonville

* * * *